



Lescha per promover la cultura ella vischnaunca Ilanz/Glion (Lescha da promoziun dalla cultura; Lpc)

dils nunenconuschent (versiun dils nunenconuschent)

Il parlament communal dad Ilanz/Glion,

sebasond sin art. 4 e 5 lit. d sco era art. 35 lit. a dalla costituziun communal da Ilanz/Glion (CC; LIG 11.1), suenter envesta el messadi dalla suprastanza communal dils 23 d'uost 2022,

decida:

I. Object

Art. 1 Object

¹ Quella lescha reglescha la promoziun dalla veta culturala ella vischnaunca dad Ilanz/Glion.

Art. 2 Finamiras

¹ La promoziun dalla cultura ella vischnaunca dad Ilanz/Glion ha cunzun la finamira da:

- a. renconuscher la muntada socioculturala dallas uniuns en tut las fracziuns;
- b. sustener il lungatg romontsch e la cultura romontscha;
- c. da possibilitar ina purschida multifara d'activitads culturalas cunzun ellas spartas cant, musica, art figurativ, grafica e design, fotografia, kino e film, museums ed ierta culturala, documentaziun ed intermediaziun da cultura architectonica, teater e sault sco era litteratura;
- d. promover l'activad culturala da tut ils cerchels dalla populaziun;
- e. render veseivla e promover la creaziun culturala d'artistas indigenas e d'artists indigens;

-
- f. sustener l'integraziun da personas digl exteriur e personas nievarrivadas;
 - g. garantir ina purschida sufficienta da bibliotecas, mediatecas e ludotecas.

² In accent dalla promoziun dalla cultura communal e il sustegn dall'activad e participaziun culturala dils affons e giuvenils.

Art. 3 Prestaziuns

¹ Las prestaziuns dalla vischnaunca ad uniuns, instituziuns e personas activas sin il camp cultural engaschadas ella vischnaunca cumpeglian la garanzia:

- a. da contribuziuns annualas ad uniuns e gruppas da cultura;
- b. da contribuziuns a projects;
- c. da contribuziuns periodicas cun cunvegns da prestaziun;
- d. da cundiziuns d'utilisaziun favoreivlas ed atgnas prestaziuns;
- e. d'acquisiziuns.

Art. 4 Principis da promoziun

¹ La vischnaunca promova la creaziun culturala tenor criteris qualitativs. Supplementarmein risguarda ella cunzun:

- a. sia muntada per la vischnaunca;
- b. sia accessibladad per ina participaziun activa e passiva dad aschi biaras personas sco pusseivel.

² La vischnaunca sustegn negins projects e neginas instituziuns culturalas che han principalmein in intent commercial ni ch'ei buc accessibels publicamein.

Art. 5 Libertad ed independenza

¹ La vischnaunca ha stema dalla libertad e dall'independenza dalla creaziun e veta culturala.

II. Prestaziuns e criteris**Art. 6** Contribuziuns annualas ad uniuns e gruppas da cultura

¹ Contribuziuns annualas survegnan uniuns e gruppas da cultura sesentas ella vischnaunca en renconuschientscha da lur prestaziuns en uffeci d'honor per la veta socioculturala ella vischnaunca. Ellas secumponan d'ina contribuziun da basa e da contribuziuns da bonus.

² La contribuziun da basa importa denter 250 e 450 francs e vala sco indemnizaziun pauschala.

³ La contribuziun da basa sa vegnir augmentada cun contribuziuns da bonus denter 100 e 300 francs tut tenor categoria cun igl adempliment da prestaziuns supplementaras sco:

- a. realisar occurrenzas publicas cun intents idealistics;
- b. integrar activamein affons e giuvenils ellas activitads ed occurrenzas;
- c. cooperar cun uniuns e personas activas sin il camp cultural dad autras fracziuns e vischnaucas;
- d. far da Sontgaclau;
- e. organisar la fiasta digl 1. d'uost ella fracziun;
- f. pinar il fiug digl 1. d'uost ella fracziun;
- g. frequentar perfecziunaments per personas da cader dall'union.

Art. 7 Contribuziuns a projects

¹ La vischnaunca conceda contribuziuns a projects culturals. Els ein da caracter unic, cuozan in temps limitau ed han in preventiv separau.

² Per la concessiun d'ina contribuziun valan ils suandonts criteris:

- a. Il petent ni la petenta habitescha ella vischnaunca ni il project ei relevonts per la vischnaunca;
- b. la qualitat artistica, professionala e culturala dil project ei evidenta;
- c. il project ei accessibels ed ina participaziun ei pussevla per in e scadin;
- d. il material da reclama che accumpogna il project ei per romontsch ni per tudestg/romontsch;
- e. il preventiv ei realistics e sa vegnir finanziaus;
- f. la realisabladad e l'organisaziun dil project ein plausiblas.

³ La vischnaunca sa prestar ina part dil sustegn en fuorma da survetschs.

Art. 8 Contribuziuns periodicas cun cunvegna da prestaziun

¹ Contribuziuns periodicas ad uniuns, gruppas da cultura ed instituziuns pretendan la conclusiun d'ina cunvegna da prestaziun. La cunvegna da prestaziun cuoza 4 onns.

Art. 9 Cundiziuns d'utilisaziun favoreivlas ed atgnas prestaziuns

¹ Prestaziuns san vegnir ademplidas era en fuorma da cundiziuns favoreivlas ni cun renunziar a taxas per l'utilisaziun da baghetgs, implonts ni infrastructuras publicas sco era cun atgnas prestaziuns da survetschs communal che vegnan buc adossadas vinavon.

² Fittanzas da localitads en immobilias dalla vischnaunca sedrezzan tenor la lescha d'immobilias e l'ordinaziun d'immobilias.

³ Il post specialisau d'immobilias dalla vischnaunca gida persunas activas sin il camp cultural ed uniuns cun basegns da spazi d'anflar localitads adattadas ellas immobilias dalla vischnaunca.

⁴ La vischnaunca nezegia ses mieds da communicaziun e sias occurrenzas per render pli veseivlas ed enconuschentas persunas activas sin il camp cultural e persunas che realiseschan occurrenzas.

Art. 10 Acquisiziuns

¹ Per promover igl art figurativ sa la vischnaunca acquistar ovras d'artistas indigenas e d'artists indigens.

Art. 11 Art ed edifeci

¹ Per edifecis communal ch'ein accessibels publicamein ei da planisar in import commensurau per igl art ed edifeci.

Art. 12 Cultura da baghegiar

¹ Per edifecis communal e stanzas publicas ei la vischnaunca il bien exempel e metta peisa sin in'aulta qualitat architectonica-culturala.

III. Collaboraziun regiunala**Art. 13** Contribuziuns a projects regionalis

¹ La vischnaunca sa separticipar a projects culturalis dalla Regiun Surselva ed a projects ordeifer il perimeter communal.

IV. Promoziun dalla generaziun giuvna**Art. 14** Promoziun dalla generaziun giuvna

¹ La vischnaunca sustegn cun contribuziuns extraordinarias projects d'organisaziuns e da persunas qualificadas che surveschan en special alla promoziun culturala d'affons e da giuvenils tochen 20 onns sesents ella vischnaunca.

V. Organisaziun ed execuziun**Art. 15** Suprastonza communal

¹ Per l'execuziun da quella lescha ei la suprastonza communal responsabla.

² Ella ha cunzun las suandontas incumbensas:

- a. approbar il concept per promover la cultura;
- b. concluder davart propostas dalla cumissiun da cultura.

Art. 16 Cumissiun da cultura

¹ La suprastonza communal elegia suenter l'audiziun dalla cumissiun da cultura ina cumissiun da cultura che consista da tschun commembers. Da quella fan part representantas e representants da differentas spartas culturalas ed ina representanza dil parlament communal.

² La cumissiun da cultura cusseglia la suprastonza communal en tut las damondas che pertuccan la promoziun dalla cultura, cunzun:

- a. giudichescha ella las damondas per contribuziuns unicas ni periodicas e fa ina proposta leusunter;
- b. prepara ella las convegnas da prestaziun per mauns dalla suprastonza communal;
- c. elavura ella ina proposta per il preventiv da cultura per mauns dalla suprastonza communal;
- d. sa ella suttametter damondas al commember dalla suprastonza communal ch'ei competents per la cultura.

³ La cumissiun da cultura seconstituescha sezza.

⁴ La perioda d'uffeci dallas commembras e dils commembers dalla cumissiun cuoza 4 onns. Duas periodas d'uffeci ein pusseivlas.

⁵ Il commember dalla suprastanza communal ch'ei cumpetents per la cultura ed il post da coordinaziun per la cultura fan part dalla cumissiun da cultura senza dretg da vuschar.

Art. 17 Direcziun

¹ Davart contribuziuns annualas ad uniuns e gruppas da cultura concluda la direcziun tenor proposta dil post da coordinaziun per la cultura.

Art. 18 Post da coordinaziun per la cultura

¹ La vischnaunca meina en sia administraziun in post da coordinaziun per la cultura.

² El ha cunzun las suandontas incumbensas:

- a. esser in post da contact per tiarzs sin il sector cultural;
- b. examinar la correctadad formala dallas damondas;
- c. coordinar cun il post da cultura specialisau dil cantun Grischun;
- d. suttametter alla direcziun las damondas per contribuziuns annualas ad uniuns e gruppas da cultura;
- e. far il secretariat dalla cumissiun da cultura.

Art. 19 Cumpetenzas finanzialas

¹ Davart la conderschida da contribuziuns annualas ad uniuns e gruppas da cultura tenor igl art. 6 da quella lescha decida tochen 1'300 francs il post da coordinaziun per la cultura, per imports pli aults la direcziun sin damonda dil post da coordinaziun per la cultura.

² Contribuziuns a projects tenor igl art. 7 sin damonda dalla cumissiun da cultura concluda tochen 5'000 francs la direcziun, import pli aults la suprastanza communal.

Art. 20 Damondas

¹ Damondas per contribuziuns e survetschs tenor quella lescha ein da drizzar en scret e motivadas al post da coordinaziun per la cultura.

² Sin la conderschida da contribuziuns exista da principi negin dretg.

Art. 21 Preventiv e planisaziun dallas finanzas

¹ La cumissiun da cultura elavura mintgamai per la fin d'ost ina proposta per il preventiv da cultura digl onn sequent e suttametta quella alla suprastanza communal.

² Duront l'elavuraziun dalla planisaziun dallas finanzas consultescha la suprastanza communal la cumissiun da cultura.

VI. Mieds legals e disposiziuns finalas**Art. 22** Mieds legals

¹ Encunter tut las disposiziuns sa vegnir fatg recuors enteifer 30 dis alla suprastanza communal. Il recuors sto cuntener ina proposta, ils fatgs cun ils mussaments ed ina motivaziun.

Art. 23 Ordinaziun

¹ La suprastanza communal relai per l'execuziun da quella lescha in'ordinaziun.

Art. 24 Entrada en vigor

¹ La lescha presenta ei suttamessa al referendum facultativ.

² La suprastanza communal decida, cura che la lescha entra en vigor. ¹⁾

³ Cun l'entrada en vigor dalla lescha ein las disposiziuns d'auters decrets che stattan en cuntradicziun cun ella abrogadas.

¹⁾ Mess en vigor sils xx-xx-2023 cun decisiun dalla suprastanza communal dils xx-xx-2022.

Tabella dallas modificaziuns - tenor conclus

Data dal conclus	Entrada en vigur	Element	Modificaziun	Publicaziun CRS
negina indicaziun	negina indicaziun	relasch	emprema versiun	-

Tabella dallas modificaziuns - tenor element

Element	Data dal conclus	Entrada en vigur	Modificaziun	Publicaziun CRS
relasch	negina indicaziun	negina indicaziun	emprema versiun	-